

ԼԵՌՆԱՅԻՆ ՂԱՐԱԲԱՂԻՑ ԲՈՒՆԻ ՏԵՂԱՀԱՆՎԱԾ ՈՒՍՈՒՑԻՉՆԵՐԻ ՕԺԱՆԴԱԿՈՒԹՅԱՆ ԾՐԱԳԻՐ (Իրավական իրազեկում)

Հրապարակվում է ՀՀ-ում Նիդերլանդների Թագավորության դեսպանատան ֆինանսական աջակցությամբ իրականացվող՝ «Լեռնային Ղարաբաղից բռնի տեղահանված անձանց իրավական իրազեկման և կարողությունների հզորացման» ծրագրի շրջանակներում:

ԵՐԵՎԱՆ 2024



ԲՈՎԱՆԴԱԿՈՒԹՅՈՒՆ

ԼԵՌՆԱՑԻՆ ՂԱՐԱԲԱՂԻՑ ԲՈՒԻ ՏԵՂԱՀԱՆ- ՎԱԾ ՈՒՍՈՒՑԻՉՆԵՐԻ ՕԺԱՆԴԱԿՈՒԹՅԱՆ ԾՐԱԳԻՐ	2
1. Իրավական հիմքը.....	2
2. Կարգավորման առարկան.....	2
3. Նպատակը.....	2
4. Լրավճարի չափը.....	3
5. Շահառուն	5
6. Ընթացակարգը.....	9
7. Ղիմումների ներկայացման վերջնաժամ- կետը	11
8. Ներկայացված ղիմումի չեղարկումը և կրկնակի ղիմումի ներկայացման հնարավորությունը.....	11
9. Ներկայացվող փաստաթղթերը.....	13

ԼԵՌՆԱՅԻՆ ՂԱՐԱԲԱՂԻՑ ԲՈՒՆԻ ՏԵՂԱՀԱՆՎԱԾ ՈՒՍՈՒՑԻՉՆԵՐԻ ՕԺԱՆԴԱԿՈՒԹՅԱՆ ԾՐԱԳԻՐ

Ա. Իրավական հիմքը

ՀՀ Կառավարության 2023 թվականի հոկտեմբերի 12-ի «2020 թվականի սեպտեմբերի 27-ից հետո Լեռնային Ղարաբաղից բռնի տեղահանված ուսուցիչների օժանդակության ծրագիրը հաստատելու մասին» N 1756-Լ որոշումը:

Բ. Կարգավորման առարկան

Սույն որոշմամբ կարգավորվում է 2020 թվականի սեպտեմբերի 27-ից հետո Լեռնային Ղարաբաղից Հայաստանի Հանրապետություն բռնի տեղահանված ուսուցիչների հետագա մանկավարժական աշխատանքներում ներգրավման գործընթացը:

Գ. Նպատակը

Ծրագրի նպատակն է օժանդակել 2020 թվականի սեպտեմբերի 27-ից հետո Լեռնային Ղարաբաղից բռնի տեղահանված ուսուցիչներին հավելյալ լրավճար սահմանել՝ Հայաստանի Հանրապետության մարզերի բնակավայրերի պետական հանրակրթական

ուսումնական հաստատություններում աշխատանքի անցնելու դեպքում:

Դ. Լրավճարի չափը

Ծրագրի շրջանակներում ուսուցչին Հայաստանի Հանրապետության պետական բյուջեով նախատեսված միջոցներից տվյալ հաստատության միջոցով լրացուցիչ հատկացվում է լրավճար՝ մանկավարժական **աշխատավարձի 30 տոկոսի չափով**, իսկ Սյունիքի և Վայոց ձորի մարզերի հաստատությունների, Գեղարքունիքի մարզի Ճամբարակ ու Վարդենիս համայնքների և Տավուշի մարզի Նոյեմբերյան, Իջևան ու Բերդ համայնքների հաստատությունների սույն ծրագրից օգտվող ուսուցիչներին՝ **ևս 50 000 (հիսուն հազար)** դրամ ֆիքսված լրավճար:

Ստացվում է, որ Սյունիքի և Վայոց ձորի մարզերի հաստատությունների, Գեղարքունիքի մարզի Ճամբարակ ու Վարդենիս համայնքների և Տավուշի մարզի Նոյեմբերյան, Իջևան ու Բերդ համայնքների հաստատություններում ծրագրի շահառու ուսուցիչները կստանան և՛ լրավճար՝ մանկավարժական աշխատավարձի **30 տոկոսի չափով**, և՛ **50 000 (հիսուն հազար)** դրամ ֆիքսված լրավճար:

Ծրագրով սահմանված լրավճարները հաստատությունները ուսուցիչներին են փոխանցում ամսական պարբերականությամբ:

✓ Հայաստանի Հանրապետության պետական բյուջեի «1146. Հանրակրթության ծրագիր» ծրագրի «12016. ՀՀ գյուղական բնակավայրերում մինչև 100 սովորող ունեցող պետական հանրակրթական ուսումնական հաստատություններում դասավանդող ուսուցիչներին լրավճարի սահմանում» և «12015. Հայաստանի Հանրապետության պետական հանրակրթական բոլոր ուսումնական հաստատություններում ԲՏ&Մ ոլորտի (բացառությամբ մաթեմատիկական առարկաների) դասավանդող ուսուցիչների համար վարձատրության բարձրացված հստակ չափաքանակի սահմանում» միջոցառումների շահառու հանդիսանալու դեպքում **այդ միջոցառումների ֆինանսավորման կարգերով սահմանված ժամկետային սահմանափակումները** այս ծրագրից օգտվող ուսուցիչների նկատմամբ կիրառելի չեն, և այդ **միջոցառումներով նախատեսված լրավճարները ենթակա են հաշվարկման հաստատությունների հետ պայմանագրեր կնքելու ամսվանից:**

Ե. Շահառուն

Ծրագրի շահառու է հանդիսանում այն ուսուցիչը, ով 2020 թվականի սեպտեմբերի 27-ից հետո Լեռնային Ղարաբաղից բռնի տեղահանման արդյունքում բնակություն է

հաստատել Հայաստանի Հանրապետությունում, ունի «Հանրակրթության մասին» Հայաստանի Հանրապետության օրենքով մանկավարժական աշխատողի պաշտոն զբաղեցնելու իրավունք և հավակնում է աշխատել Հայաստանի Հանրապետության **մարզերի** բնակավայրերի պետական հանրակրթական ուսումնական հաստատություններում:

- ✓ Անհրաժեշտ է նկատել, որ 2020 թվականի սեպտեմբերի 27-ից հետո Լեռնային Ղարաբաղից բռնի տեղահանման արդյունքում Հայաստանի Հանրապետությունում բնակվող այն ուսուցիչները, ովքեր ցանկանում են **Երևան քաղաքի պետական հանրակրթական** ուսումնական հաստատություններում զբաղեցնել ուսուցչի պաշտոն, **չեն համարվում** սույն ծրագրի շահառու և հետևապես չեն կարող օգտվել այս ծրագրով սահմանված լրավճարներից:
- ✓ Հարկ է պարզաբանել նաև, որ «Հանրակրթության մասին» Հայաստանի Հանրապետության օրենքով մանկավարժական աշխատողի պաշտոն զբաղեցնող անձանց ներկայացվող պահանջներ ուղղակիորեն

առկա չեն, սակայն նույն օրենքի 3-րդ հոդվածի 1-ին մասի 13-րդ կետի և 26-րդ հոդվածի 1-ին կետի համակարգային վերլուծությունից պարզ է դառնում, որ մանկավարժական աշխատողը ուսուցիչն է, իսկ ուսումնական հաստատության ուսուցիչ կարող է լինել այն անձը, որն ստացել է բարձրագույն կրթությամբ մանկավարժական համապատասխան որակավորում կամ ունի բարձրագույն կրթություն և վերջին տասը տարվա ընթացքում տվյալ առարկայի մանկավարժական (կամ ուսուցչական) գործունեության առնվազն հինգ տարվա աշխատանքային ստաժ:

✓ Մանկավարժական աշխատողի պաշտոն զբաղեցնելու իրավունք չունի այն անձը, որը՝

1) դատական կարգով ճանաչվել է անգործունակ կամ սահմանափակ գործունակ.

2) դատական կարգով զրկվել է մանկավարժական գործունեությամբ զբաղվելու իրավունքից.

3) դատապարտվել է հանցագործության համար, և դատվածությունը սահմանված կարգով մարված կամ վերացված չէ, բացառությամբ այն դեպքերի, երբ դատապարտվել է ոչ դիտավորյալ հանցագործություն կատարելու համար:

Ընդ որում՝ ՀՀ կրթության, գիտության, մշակույթի և սպորտի նախարարությունից ստացված պարզաբանման համաձայն ՀՀ ԿԳՄՍ-ն չունի ԼՂՀ դատարանների կայացրած դատական ակտերի մասին տեղեկատվությունը, ուստի **շահառուի վերաբերյալ հիմք է ընդունվում միայն դիմումի մեջ նշված հայտարարությունը:**

4) տառապում է այնպիսի հիվանդությամբ, որը կարող է խոչընդոտել մանկավարժական գործունեության կատարմանը, դրանք են՝

1. Օրգանական (ներառյալ սիմպտոմատիկ) հոգեկան խանգարումներ (F00 - F09)

2. Շիզոֆրենիա, շիզոտիպային և գառանցանքային խանգարումներ (F20 - F29)

3. Տրամադրության (աֆեկտիվ) խանգարումներ (F30 - F39)

4. Սովորույթի և հակումների խանգարումներ (F63)

5. Մտավոր հետամնացություն (F70 - F79)

6. Հոգեկան և վարքային խանգարումներ՝ հոգեակտիվ նյութերի գործածման հետևանքով (F10- F19)

7. Շնչառական օրգանների տուբերկույոյոգ՝
հաստատված մանրէաբանորեն կամ
հյուսվածքաբանորեն (A15)

Ա Ն Հ Ր Ա Ժ Ե Շ Տ Է Ի Մ Ա Ն Ա Լ

ԼՂ բոնի տեղահանված անձի կողմից ՀՀ քա-
ղաքացիություն ստանալը ծրագրի իրակա-
նացման (աջակցության դադարեցման) խոչըն-
դոտ չէ:

Զ. Ընթացակարգը

Հայաստանի Հանրապետության մարզերի
բնակավայրերի պետական հանրակրթական
ուսումնական հաստատություններում (այսու-
հետ՝ հաստատություններ) որևէ առարկայից
ուսուցչի թափուր տեղ առաջանալու դեպքում,
սահմանված կարգով ուսուցչի թափուր տեղի
համար հայտարարված մրցույթին դիմող
չլինելու կամ մրցույթը չկայանալու պարա-
գայում, նախարարությունը Կրթության կառա-
վարման տեղեկատվական համակարգի մի-
ջոցով (այսուհետ՝ ԿԿՏՀ) 2023 թվականի
հոկտեմբերի 16-ից տվյալ առարկայի գծով
շահառուներին ապահովում է տվյալ առար-
կայի գծով ուսուցչի թափուր տեղերի մասին
տեղեկատվության հասանելիությունը, որը

պարունակում է տեղեկատվություն հաստատության անվանման, տեղակայման վայրի, դասավանդվող ժամերի քանակի, դրույքաչափի մեծության մասին:

Նշված թափուր տեղերից շահառուն ընտրում է մեկը՝ նշում կատարելով ԿԿՏՀ-ի համապատասխան դաշտերում, որոնց հիման վրա ինքնաշխատ եղանակով ձևավորվում է տվյալ թափուր տեղի համար դիմումը: Դիմումատուն իր ցանկությամբ կարող է ներբեռնել նաև փաստաթղթերի լուսապատճեններ՝ դրանց առկայության դեպքում:

Աջակցության ծրագրի շահառուն կարող է դիմել սահմանված ընթացակարգով և թափուր տեղը համալրել **արտամրցությամբ** հիմունքներով:

Դիմումատուի հետ աշխատանքային պայմանագիր կնքելու նպատակով նախարարությունը համապատասխան ուղեգրով դիմում է տվյալ հաստատությանը: Ընդ որում, **պայմանագրի ժամկետ է սահմանվում պայմանագրի կնքման պահից մինչև 2-րդ ուսումնական տարվա ավարտը**, իսկ սույն ծրագրի շրջանակներում կնքված պայմանագրի վաղաժամկետ լուծման դեպքում տվյալ ուսուցիչը զրկվում է սույն ծրագրից կրկին օգտվելու իրավունքից (բացառությամբ բնակության վայրի փոփոխությամբ պայմանավորված դեպքերի):

✓ Դիմում ներկայացնելու համար անհրաժեշտ գրանցվել Լեռնային Ղարաբաղից բռնի տեղահանված ուսուցիչների աջակցության հարթակում (<https://kadrer.emis.am>) և ուղարկել հայտ:

Գրանցման և հայտ ուղարկելու քայլ առ քայլ ուղեցույցը հրապարակվել է ՀՀ ԿԳՄՍ նախարարության կողմից, որը կարող եք տեսնել հետևյալ հղմամբ՝ <https://escs.am/am/news/18643>

Է. Դիմումների ներկայացման վերջնաժամկետը

Ծրագրի շրջանակներում դիմումների ներկայացման վերջնաժամկետն է **2024 թվականի դեկտեմբերի 31-ը**:

Ը. Ներկայացված դիմումի չեղարկումը և կրկնակի դիմումի ներկայացման հնարավորությունը

Դիմումատուն կարող է դիմելուց հետո 10-օրյա ժամկետում չեղարկել իր դիմումը տվյալ թափուր տեղի համար:

Դիմումի չեղարկման պարագայում շահառուն կարող է կրկին դիմում ներկայացնել Կրթության կառավարման տեղեկատվական համակարգում հասանելի այլ թափուր տեղերից մեկի համար, իր ընտրությամբ, նույն ընթացակարգով:

Երկրորդ անգամ ներկայացված դիմումի չեղարկման պարագայում շահառուն կորցնում է ծրագրից առաջնահերթության իրավունքով օգտվելու հնարավորությունը և ուսուցչական թափուր տեղի համալրման գործընթացին կարող է մասնակցել օրենսդրությամբ սահմանված կարգով¹:

ԱՆՀՐԱԺԵՇՏ Է ԸՆԴԳԾԵԼ, որ

Կենտրոնի հարցմանն ի պատասխան ԿԳՄՍ նախարարությունից ստացվել է գրություն, ըստ որի 2023 թվականի հոկտեմբեր ամսից մինչև 2024 թվականի հոկտեմբերի 15-ը 71 ուսուցչի հետ կնքված պայմանագրեր վաղաժամկետ

1

<https://www.arlis.am/documentview.aspx?docid=194172>
ՀՀ կրթության և գիտության նախարարի 2013 թվականի հունիսի 21-ի N 396-ն հրամանը՝ հանրակրթական ուսումնական հաստատության ուսուցչի թափուր տեղի համար անցկացվող մրցույթի օրինակելի կարգը հաստատելու և ՀՀ կրթության և գիտության նախարարի 2010 թվականի օգոստոսի 2-ի n 1262-ն հրամանը ուժը կորցրած ճանաչելու մասին:

դադարեցվել են շահառուների նախաձեռնությամբ՝ բնակավայրը փոխելու կամ այլ պատճառով:

Բնակության վայրի փոփոխությամբ պայմանավորված պայմանագրի վաղաժամկետ լուծման դեպքում, սակայն, ուսուցիչը հնարավորություն ունի օգտվել կրկին օգտվել ծրագրի արտոնյալ պայմաններից:

Թ. Ներկայացվող փաստաթղթերը

- Բարձրագույն կրթության դիպլոմի բնօրինակի տեսաներածված (scan) տարբերակը,
- Անձնագրի կամ նույնականացման քարտի բնօրինակի տեսաներածված (scan) տարբերակը,
- Ինքնակենսագրություն,
- Բնութագիր նախկին աշխատավայրից (առկայության դեպքում),
- Մասնագիտական գիտելիքների և աշխատանքային ունակությունների տիրապետման տեսանկյունից ներկայացվող պահանջների բավարարումը հավաստող այլ փաստաթղթեր (դիմումատուի ցանկությամբ):

ՈՒՇԱԴՐՈՒԹՅԱՆ Է ԱՐԺԱՆԻ

2020 թվականի սեպտեմբերի 27-ից հետո Լեռնային Ղարաբաղից բռնի տեղահանված ուսուցիչների օժանդակության ծրագրով որևէ սահմանափակում չկա մարզերի դպրոցներ գործուղված մանկավարժներին հատկացվող դրամական օժանդակությունից օգտվելու մասին:

Ուստիև սույն ծրագրի շահառուն կարող է մինևսույն ժամանակ օգտվել նաև ՀՀ հեռավոր, սահմանամերձ, լեռնային և բարձր լեռնային բնակավայրերի պետական հանրակրթական դպրոցներ գործուղված մանկավարժներին հատկացվող դրամական օժանդակությունից:

ՕԳՏԱԿԱՐ ՀՂՈՒՄՆԵՐ

ՀՀ ԿԳՄՄ նախարարությունը պատրաստել է քայլ առ քայլ ուղեցույց, թե ինչպես ԼՂ բռնի տեղահանված ուսուցիչները պետք է ՀՀ մարզեր ուսուցիչների գործուղման համակարգում գրանցվեն և հայտ ներկայացնեն:

Այդ ուղեցույցը կարող էք ներբեռնել հետևյալ հղումով՝



<https://escs.am/files/files/2023-10-27/f8ed7d1373ddcc718b61e39b5acbc51b.docx>